

**Uunga siunnersuut: ”Nunalerinermik inuussutissarsiuteqarnermik siuarsaaneq pillugu Inatsisartut inatsisaat”**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

**Saqqummiussissut**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

**Siullermeerneqarnera**

Naalakkersuisut sinnerlugit ”Nunalerinermik inuussutissarsiuteqarnermik siuarsaaneq pillugu Inatsisartut inatsisaannut” siunnersuut matumuuna saqqummiuppara.

Nunalerinermi pilersitsisinnaassuseqarnerup imminullu akilersinnaanerup pitsanngorsarneqar-nissaat, 2021-2030-mut Nunalerinermut Periusissiami siunertaavoq. Anguniakkat taakkua anguneqarnissaannut, aningaasaqarnikkut piujuartitsinerulluni nunalerinerup ineriartortinnis-saanut tunngavissiisussamik, ullutsinnut naleqqunnerusumik inatsiseqarnissaq pisariaqartinne-qarpoq.

Inatsisissamut siunertaasoq pingaarneq tassaavoq inatsimmik immersugassamik, paasiu-minartumik, ullutsinnut naleqquttumik aammalu nunalerinermik inuussutissarsiutilinnut tama-ginnut atoruminartumik pilersitsinissaq. Inatsisissatut siunnersuummi nunalerinermik inuussu-tissarsiornerup ineriartortinneqarnera tunngavissinneqassaaq aammalu aningaasaqarnikkut piujuartussamik tunisassiornermut siuarsaassalluni, inuussutissanut suliassaqarfimmi imminut pilersornissamut iluaqutaasussamik.

Inatsisissatut siunnersuummi allannguutit annertuut arlallit ilanngussinerillu saqqummiun-neqarput.

Inatsimmi ilanngunneqarpoq inuussutissarsiutinik siuarsaanermi aallararterlaami maannakkut aamma immami uumassusilinnik naatitsineq kiisalu illup iluani naatitanik naatitsineq (indoor farming) ilanngunneqarput.

Inatsimmi aamma inuussutissarsiutigalugu nunalerinermut tapersiivigineqarsinnaassagaanni piunasaqaatit minnerpaaffissai nutaat aalajangersarneqarput. Tamanna nunalerinermik inuus-sutissarsiuteqarnerup imminut akilersinnaanerulernissaanut qulakkeerinneqataassaaq.

Aammalu qinnuteqartut ingerlatsinermut missingersuutit naatsorsuutillu pillugit uppernarsaa-taannut piunasaqaatit sukannernerusut atuutsinneqalissapput.

Allanngortitsinerni nunalerinermik inuussutissarsiutilinnik oqaloqateqarneq aallaavigineqar-poq, peqatigisaanillu Naalakkersuisut 2021-2030-mut Nunalerinermut Periusissiaannut tunnga-vissiisalluni. Piffissaq iluatsillugu nunalerinermik inuussutissarsiutillit inatsisip sularineqar-neranut atatillugu oqaloqatigiilluarsimanermut qutsavigerusuppakka.

Taamatut oqaaseqarlunga Naalakkersuisut sinnerlugit siunnersuut Inatsisartunut kajumittumik suliassanngortippara.